

आकाशवाणी जयपुर-अजमेर
दिनांक 14.02.2025 समय: 18.45 बजे
प्रादेशिक समाचार

- भारत अर अमेरिका साल 2030 ताई आपसी कारोबार 500 बिलियन डॉलर रा लेवल ताई पूगावण रो फैसलो कीनो।
- राज्यपाल हरिभाऊ बागडे ज़रूरत रे मुजब ही ऊर्जा काम लेवण री अपील कीनी।
- प्रसार भारती रा चैयरमैन नवनीत कुमार सहगल आकाशवाणी रा जयपुर केन्द्र रो दौरा कीनो-रेडियो ने सूचनावां देवण रो सस्तो अर मज़बूत ज़रियो बतायो।
- 38वां राष्ट्रीय खेल उत्तराखंड मांय पूरा व्ह्या-सशस्त्र सेना बल 121 तमगां सागे अव्वल रह्यो-राजस्थान ने 43 तमगा मिल्या।

000

भारत अर अमेरिका साल 2030 ताई आपसी कारोबार दोगुणो कर र इण ने 500 बिलियन डॉलर रा लेवल ताई ले जावण रो फैसलो कीनो है। प्रधानमंत्री नरेंद्र मोदी रा अमरीका दौरा रा तैत आज वाशिंगटन डी.सी. रा व्हाइट हाउस मांय प्रधानमंत्री नरेन्द्र मोदी अर अमरीका रा राष्ट्रपति डोनाल्ड ट्रंप बीचे व्ही बातचीत रे दौरान ओ फैसलो करी ज्यो। मीटिंग मांय अमेरिका रा राष्ट्रपति डोनाल्ड ट्रंप कह्यो के भारत अर अमेरिका बीचे सब ऊं मोटा कारोबारी गेलां मांय ऊं एक भारत मध्य पूर्व यूरोप माली गलियारो बणावण माथे ई सहमति बणी है। चर्चा पाछे अमेरिका रा राष्ट्रपति डोनाल्ड ट्रंप री मौजूदगी मांय खबरनवीसां सागे बातचीत करता थकां श्री मोदी कह्यो के भारत अर अमेरिका आतंकवाद रे खिलाफ लड़ाई मांय मज़बूती ऊं एके सागे है।

.....

राज्यपाल हरिभाऊ बागडे ज़रूरत रे मुजब ऊर्जा काम लेवण री अरज कीनी है। श्री बागडे आज जयपुर मांय पेट्रोलियम अर प्राकृतिक गैस मंत्रालय अर तेल अर प्राकृतिक गैस कंपनियां कानी ऊं राख्यी ज्यो संरक्षण क्षमता महोत्सव रा उद्घाटन जळसा मांय बोल रह्या हा। राज्यपाल पेट्रोल अर डीजल मांय इथेनॉल भेळ र कार्बन उत्सर्जन अर दिसावर ऊं तेल मंगावणो कम करण री कोशिश माथे ई जोर दीनो। राज्यपाल कह्यो के सगळां ने मिल र ऊर्जा उत्पादन बधा र अर ऊर्जा रो कम ती कम उपयोग कर र देश ने तेल अर गैस रा हलका मांय खुद रे पाण ऊबो करण मांय मदद करणी चाहिजे। संरक्षण क्षमता महोत्सव 28 फरवरी ताई चालेला।

000

मुख्यमंत्री भजनलाल शर्मा सरपंचां ऊं आप-आप रा हलका रा बेहतर तरीका ऊं विकास सारु समय सागे खुद ने मजबूत बणावण बाबत् कह्यो है। वे आज डीडवाना-कुचामन ज़िला रा कुचामन सिटी मांय समाजसेवी अर वठे रा पैली वाळां सरपंच भंवरा राम कड़वा री मूरत रा अनावरण जळसा मांय बोल रह्या हा। मुख्यमंत्री कह्यो के सरपंच गांव रा विकास री खास कड़ी व्हे है।

.....

मुख्यमंत्री कह्यो के राज्य री मौजूदा सरकार इण रा कार्यकाल रा पहला ई साल मांय किसानां, नौजवानां, महिलावां अर गरीब तबका री जनता रा भला सारु कई जतन कीना है। वे कह्यो के रामजल सेतु लिंक परियोजना रे जरिये मोटी तादाद मांय प्रदेश री जनता ने पीवण अर पाणत सारु पाणी मिल सकेला। कार्यक्रम मांय महिला अर बाल विकास राज्यमंत्री मंजू बाघमार अर पैली वाळी सांसद ज्योति मिर्धा समेत जनता रा नुमाइन्दा अर मोटी तादाद मांय जनता मौजूद रही।

000

गृह राज्यमंत्री जवाहर सिंह बेढम आज डीग ज़िला रा बरई गांव मांय शहीद हवलदार सुकेश गुर्जर री मूरत रो अनावण कीनो। ई मौके वे नौजवानां ऊं फौजियां ऊं सीख ले र राष्ट्र प्रथम री भावना

सागे आगे बधबा सारु कह्यो। गृह राज्यमंत्री बरई मांय विकास रा और काम करावण रो ऐलाण ई कीनो।

000

प्रदेश मांय काल सोशल मीडिया अभियान रे जरिये जनता मांय टी.बी. री बीमारी रा प्रति जाग जगायी जावेला। ओ खास कैम्पेन टीबी मुक्त ग्राम पंचायत अभियान रा तहत चलायो जावेला। ई सारु जयपुर मांय जिला अर ब्लॉक लेवल माथे कार्यशालावां राख र अहलकारां ने इण री जाणकारी दीरीजी। ई सारु बेहतरीन काम करण वाळां रो आवती 24 मार्च ने राष्ट्रीय क्षय रोग दिवस रे मौके राख्या जावण वाळा राज्य स्तर रा जळसा मांय मान कर्यो जावेला।

000

प्रसार भारती रा चैयरमैन नवनीत सहगल कह्यो है के रेडियो सूचनावां ने पूगावण रो सस्तो अर मजबूत जरियो है। श्री सहगल आज आकाशवाणी जयपुर रा दौरा सारु पधार्या। ई मौके वे कह्यो के रेडियो समाज रा सगळा तबकां ताई वां ऊं जुड़ी बातां पूगावे है। श्री सहगल कार्यक्रमां ने और बेहतर बणावण सारु सुणबा वाळां ऊं ई राय देवण बाबत् कह्यो।

ई मौके श्री सहगल आकाशवाणी जयपुर ऊं प्रसारित कर्या जा रह्या कार्यक्रमां रो जायजो लीनो अर अहलकारां ने जरूरी हुकम दीना।

000

देश आज पुलवामा आतंकी हमला री छठी बरसी रे मौके शहीद जवानां ने सिरधा भाव सागे याद कर रह्यो है। ई मौके प्रदेश मांय ई न्यारा-न्यारा कार्यक्रम राख्यी ज्या। पाली री स्कूलां मांय दो मिनट रो मौन राख र शहीदां ने सिरधाभाव सागे याद करी ज्या। भीलवाडा जिला रा जहाजपुर मांय खूनदान शिविर लगायी ज्यो। झुंझुनूं मांय शहीद स्मारक माथे राख्यी ज्या श्रद्धांजलि कार्यक्रम मांय पैली वाळा फौजी अर वां रा पिरवार वाळा ई मौजूद रह्या। ध्यानजोग है के हिफाजती दस्तां ने ले जा रही सी.आर.पी.एफ. री गाड़ियां माथे जम्मू-श्रीनगर नेशनल हाई-वे माथे 2019 मांय व्ह्या हमला मांय 40 सुरक्षाकर्मचारी देश सारु जान कुर्बान कर दीनी ही। आं मांय पांच जवान राजस्थान रा हा। राजसमंद मांय वॉक फॉर पीस मैराथन राख्यी ज्यो, जिण मांय मोटी तादाद मांय स्कूली विद्यार्थी अर पुलिस रा जवान शामिल व्ह्या। भरतपुर मांय किला रा शहीद स्मारक माथे पुष्पांजलि कार्यक्रम राख्यी ज्यो।

000

38 वां राष्ट्रीय खेल आज उत्तराखण्ड रा हल्दवानी मांय पूरा व्हे गया। पदक तालिका मांय फौज रा तीन्यू अंगां री भेळी टीम सोना रा 68 तमगां समेत कुल 121 तमगा जीत र अव्वल रही। महाराष्ट्र सोना रा 54 तमगां सहित कुल 201 पदक जीत र दूजी अर हरियाणा सोना रा 48 पदकां समेत 153 तमगा जीत र तीजी ठौड़ माथे रह्या। राष्ट्रीय खेलां मांय राजस्थान 43 तमगां सागे चौदहवीं ठौड़ माथे रह्यो। आ मांय सोना रा नौ, चांदी रा 11 अर कांसा रा 23 तमगा शामिल है। समापन जळसा मांय खेल मंत्री मनसुख मांडविया कह्यो के खिलाड़ियां री जीत वां रा राज्य अर हलका रो माथो ऊंचो कीनो है।

एसबी मनसुख मांडविया

समापन जळसा मांय उत्तराखंड रा मुख्यमंत्री पुष्कर सिंह धामी, मेघालय रा मुख्यमंत्री कोंगकल संगमा, केन्द्रीय सड़क अर परिवहन राज्य मंत्री अजय टम्टा, भारतीय ओलंपिक संघ री अध्यक्ष पी.टी. ऊषा समेत कई मान्योड़ा लोग मौजूद रह्या। खेलां रो उद्घाटन प्रधानमंत्री नरेन्द्र मोदी 28 जनवरी ने देहरादून मांय कीनो हो।

000

अर अब समाचार महाकुंभ ऊं —

प्रयागराज मांय चाल रह्या महाकुंभ मांय जातरूआं ने डाक विभाग री ओर ऊं मेळा हलका मांय शिविर लगा र आधार अर दूजा कागजातां मांय जरूरी बदलाव करण रा सुबीता दिया जा रह्या है।

संचार मंत्री ज्योतिरादित्य सिंधिया प्रयागराज रा अरैल घाट डाकघर मांय महाकुंभ 2025 री यादगिरी रा तौर ऊं तीन स्मारक डाक टिकट जारी कीना। आं स्मारक डाक टिकटां मांय त्रिवेणी तीर्थ रा तीन खास पहलुआं— महर्षि भारद्वाज आश्रम, स्नान अर अक्षयवट ने बतायी ज्या है। पवित्र स्नान रा दिनां ऊं जुड़्या खास कवर, 'दिव्य, भव्य अर डिजिटल महाकुंभ' अर पोस्टकार्ड समेत न्यारा—न्यारा डाक टिकट ई जारी करी ज्या है। ई बीचे प्रयागराज महाकुंभ मांय सिरकत करण सारू जावण वाळा जातरूआं रा सुबीता सारू चलायी ज्यी बाडमेर—बरौनी महाकुंभ मेला स्पेशल रेलगाड़ी तीजा फेरा मांय आज सिंज्यां बाडमेर ऊं रवाना व्ही। आ गाड़ी रात नौ बज र बीस मिनट परां जोधपुर पूग र दस मिनट रूक्यां पाछे साढे नौ बज्यां प्रयागराज सारू रवाना व्हेला। आ रेलगाड़ी काल सिंज्यां 7 बज र 5 मिनट परां प्रयागराज टेशन पूगेला।

.....